

## ■ SCRIPTORIUM

## Corsi intensîf di littera gotica

Al è timp fint ai 15 di Zenâr par iscrivisi al cors intensîf (trê dîs) di littera gotica che Scriptorium Foroiuliense, la scuele di scrituriscj di Ruvigne, al organize par vinars ai 30, sabide ai 31 di Zenâr e domenie Prin di Fevrâr.

Lis lezions a laran indevant di buinore fin sere, cun lezions storichis teorichis e esercitazioni praticis su la lavorazion de pergamene e de cjarte, la realizazion dai penâi e l'ûs de plume di ocje, la produzion dal ingjstri naturâl, la aplicazion dal aur pes miniaturis.

Il cost al è di 250 euros e al è comprensîf di materiâl didactic e dal kit professionâl che a restaran ai partecipants. I mestris a saran **Roberto Giurano** (pe caligrafie), **Angelo Floramo** (pe storie), **Caterina Vallini** e **Emanuele Sivillotti** (pes miniaturis).

Par plui informazions, si pues visitâ il sît <http://scriptoriumforoiuliense.it/corso-littera-gotica> o scrivi une email a [marketing@scriptoriumforoiuliense.it](mailto:marketing@scriptoriumforoiuliense.it).

## SCOLTADIS DI DRIUS

## La vecje ostarie

I locai dal Friûl cumò si clamin: Wine bar, Fast Food, Bistrot, Slow drink, Barrique, Snak bar. Ce tant che mi mancje l'ostarie di Alme di Blessan!



Euronews informa

# Memoreant Agnul

Par ricuardâ il poete e scritôr Angelo Michele Pittana, a son in program doi apontaments, a Codroip e a Sedean. » DI CHRISTIAN ROMANIN



Agnul di Spere

Foto dal Nuovo Linuti, dizionario biografico

Riduçant, o olsi a dîti, o muart, che no tu esistis". Cussì lu à saludât **Roberto Iacovissi**, che come tancj di lôr a àn cognossût e a sintin la sô manjance. **Angelo Michele Pittana** (Agnul di Spere, dal non de sô famee 'chei di Spere' di Sedean) al inmò presint, ancje se a son passâts za 10 agns di chel dopomisdì dai 11 di Zenâr che al à sierade la sô esistence su cheste tiere.

In chescj dîs a son in program doi apontaments organizâts par memoreâlu: vinars ai 09 aes 18.00 li de sale consiliâr dal Comun di Codroip; sabide ai 10 aes 20.45 li dal teatri 'Clabassi' di Sedean, dentri di 'Puints', la rassegne dal Istitût Ladin Furlan

'pre Checo Placerean'.

"Mi mancje, e ancjemò di plui mi mancje cumò che cetancj di lôr che a condividevin un afiet sincêr pal Friûl, a son lâts vie, e la lôr lezion di vite e di culture e riscje di restâ tal scûr" al amet Iacovissi, che al intervignarà a Codroip.

## SALT LEAM CUL FRIÛL

Agnul di Spere al jere inzegnâr e al veve vivût par passe 30 agns in Svizze, ma al veve savût tignî salt il leam cul Friûl, lavorant une vore e "in maniere dignitose" pe lenghe furlane (come che, rispuidint a une interviste, al veve declarât di volê jessi ricuardât, ndr). Poete, scritôr, tradutôr,

al veve vuidât diviersis realtâts a pro de lenghe furlane.

"Mi riten fortunât di vê cognossût e frecuentât tai agns de mê formazion une persone cussì straordenarie. Umanamentri, al veve une dolcece e une pachee inglese tal cjararâ che ti metevin daurman in benstâ" al commente **William Cisilino** che al varà il compit di ricuardâ Agnul di Spere sabide a Sedean.

## MAI RABIÛS

"In tancj agns di amistât - al conte Cisilino - no lu ai mai sintût inrabiâsi o vêse a mâl cun cualchidun. Ma il so jessi mugnestri e umil no si traduseve mai in sotanance: al puartave indevant lis sôs ideis cun fuerce e cun stîl. La sô culture e jere sterminade e nissun plui di lui al saveve meti la cuistion furlane tal mieç dal mont, cjarant fûr ducj i leams dal câs".

E nol à dubis Cisilino su la ereditât lassade di Pitane "Intant un scjap di libris che a insiorin cetant la leterature furlane. La sô ricolte di poesiis 'Un Istât' e je stade definide de critiche il miôr cjançonîr di amôr par furlan. Cun di plui al à scrit tant ancje in prose sedi intal cjamp leterari, sedi ta chel lessicografic e de toponomastiche".

"Fra lis tantis, nus è vignût a mancjâ un dai plui impuartants trait d'union cu la Ladinie svizze" al sere Cisilino "Agnul al jere di fat un dai plui ferbints sostegnidôrs de interladinitât".



ilfriuli@ilfriuli.it

## La Provincia di Udin dongje de Caritas: assegnâts a gratis i furgons pe racuelte dai vistîts

Esarà rinovade la convenzion tra la Provincia di Udin e il centri Caritas de Arcidiocesi furlane dulà che l'Ent di aree vaste al da, in comodât di ûs gratuit ae onlus, dôs machinis (un Fiat Ducato e un Doblò Cargo) pe racuelte di vistîts, scarpis e accessori di vistiari.

Il proseguiment de colaborazion, inviade tal 2009, al è stât deliberât dilunc de ultime sentade de Zonte provinciâl su proposte dal assessôr pal Ambient Carlo Teghil che al spiegha lis finalitâts: "Di une bande o confermin une poie a iniziativis di solidarietât smiradis a sostignî lis dibisugnis di fameis e personis che, simpri di plui ancje tal nestri

teritori, a vivin in cundizions di disasi e necessitât; di chê altre bande o sostignin ancje l'inseriment tal ambient dal lavôr di sogjets disvantazâts e, in grazie dal lôr operât, o contribuìn a miorâ la racuelte dai refudums".

La gnove convenzion e durarà 2 agns: dal 1 di Zenâr dal 2015 ai 31 di Dicembar dal 2016. La ativitât dal centri Caritas de Arcidiocesi di Udin e je partide tal 1995 e pe racuelte dai induments, scarpis e accessori di vistiari metûts tai scovaçons di proprietât de Provincia di Udin e distribuîts su dut il teritori provinciâl, la Caritas si zove di cooperativis sociâls o personis in cundizions di svantaç sociâl.



Inte foto l'assessôr provinciâl pal Ambient Carlo Teghil